


Meta principal di parke marino ta pa garantis e siguridad di biodiversidad

ORANJESTAD – Gobierno di Aruba ta preparando pa introduci Aruba su parke marino. E meta principal di introduci e parke marino ta por garantis e siguridad di biodiversidad grandi cu tin den nos awanan y pa nos futuro generacionnan.

Segun e comunicado cu nos a ricibi ta cu e areanan cu lo cay bou di e parke marino a wordo asigna hopi tempo pasa ora expertonan a señala e potencial y importancia di e areanan aki. Piscadonan como tanto buceadonan a informa tocante diferente desaroyonan cu a tuma luga den nos awanan teritorial cu tempo como entre otro, piscanan cu a cuminsa disparce y coralnan cu ta sufri na man di ankernan cu ta wordo tira riba nan. Esaki tin un efecto directo riba nos turismo como tambe nos industria di pesca. Luganan pa snorkel ta cuminsa bira menos atractivo y piscadonan ta haya nan mes



ta bay hopi leu den lama pa por gara pisa.

E promesa di e parke marino ta cu esunnan involucra lo por yega na un acuerdo pa asina

nan no wordo perhudica pa e leynan cu lo wordo stipula como tambe sigura cu futuro

generacionnan lo por disfruta di nos beyesanan natural. Gobierno di Aruba ta confia den e experticio di esunnan cu dia aden y dia afo ta opera den e areanan aki mirando cu nan sa kico ta tumando luga. Bou maneho nobo, lo tuma na cuenta e impacto riba diferente actor y educa esunnan concerni tocante e importancia di proteha nos naturalesa y duna naturalesa un chens di reestablece su mes ora cu su recursonan wordo uza. E introduccion di un parke marino ta algo cu tin mas cu 30 aña largo den plannan y awo ta mas cerca di su fase di concretisacion.

Naturalesa tin su manera di cuida su mes, pues nos tur por traha den balansa cu ne. Pa es motibo tur organizacion, fundacion of comerciante cu ta haci uzo di e area incluyendo piscado, buceado, deportista, operadoman di deporte acuatico, lo wordo scucha y por contribui na nos parke marino.